

INSVLÆ AMERICANÆ.

spaniam vehuntur, in quatuor hujus provinciarum municipiis, ad summam quingentorum milium cargarum ascendant. Carga est, quantum vir una vice ferre potest. Vulcanus hic est, sive mons flammivomus, nonnullis annis tantam cinerum copiam evomens, ut vicinas valles longe lateque contegat. Provincia S. Salvatoris soli fertilitate præcedentibus non cedit. Indigenæ hic è certis graveolentibus & virulentis vermibus efformant certos pastillos ad varios medicinarum usus. Oppidorum in his provinciis facile princeps est S. Jacobi de Guatimala, utpote metropolis hujus præfecturæ. Alia sunt S. Salvatoris, Trinitatis, S. Michaelis, & Xerez de la Frontera. Solum provinciæ, & præfecturæ Honduræ, aut erigitur in altos montes, aut subsidet in amœnas & fecundas valles, maizii, tritici, & pecudum feraces, ceræ etiam & mellis. Fodinæ hic reperiuntur auri, argentiq; Oppida numerat quatuor, præcipuum Valledolid, Præfecti sedem regique Quæstoris. Hic Cathedralis Ecclesia, & Episcopi domicilium fuit ab anno 1558 à Truxillo huc traducta. Huc metalla in vicinis provinciis effossa, eliquanda

subvehuntur. Alia sunt Gracias à Dios, S. Petri, Puerto de Cavallos. Truxillum, & S. Iorge de Olancho municipia sunt. Nicaragua diversas provincias complectitur, Nicoyam, Nequecheri, Mabyte, Diriam, Masayam, aliasque. Terra commeatu abundat, tritico caret, sed ex Peru farina submittitur. Oppida hic sunt, Legio de Nicaragua, Granada, Nova Segovia, Iaena & municipium Realejum. Costa Rica solum habet satis fertile. Duo in ea oppida ab Hispanis habitantur, Aranivez & Carthago, quæ portum habet, stationemque ad exonerandas naves ad mare Australe & Septemtrionale. Veragua provincia montosa est, arboribus fructicisque plena, sine pascuis & pecude, tritico, hordeo: parum maizii & olerum habet, sed auro abundat, ob fodinarum præstantiam. Incolæ audaces & bellicosi cum Hispanis ut plurimum præliantur. Architalassus Columbus hanc primum detexit anno 1502. Incolunt hic Hispani oppidum Conceptionis, ubi Gubernator residet, alique ministri regii, municipium S. Trinitatis, oppidum S. Fidei cum officina eliquatoria: oppidum Caroli, parvi momenti est portus.

